



Դեկտեմբերի 3-ին Բյուրեղավանցի լողորդ Վահրամ Նիգոյանը կդառնար 43 տարեկան: Ավանդույթի համաձայն՝ նրա տարեդարձի օրը քաղաքապետարանի աջակցությամբ և ընկերների նախաձեռնությամբ կազմակերպվել էր հուշամրցաշար: Ս. Վարդանյանի անվան ավագ դպրոցի մարզադահլիճում կայացավ մրցաշարը: Հենց այս մարզադահլիճում Վահրամը դասավանդել է ֆիզկուլտուրա առարկան, երեխաներին փոխանցելով իր մարզական գիտելիքները: Այստեղ աշխատել է նաև տնտեսական գծով փոխտնօրեն: Ի հիշատակ Վահրամ Նիգոյանի բացման արարողության սկզբում ներկաները մեկ րոպե լռությամբ հարգեցին նրա հիշատակը: Ավագ դպրոցի տնօրեն Կարինե Խաչիկյանը մրցաշարն ազդարարեց բացված: Խոսելով գործընկերոջ մասին՝ նշեց նրա մարդկային բարձր հատկանիշների մասին: Այնուհետև Վահրամի ընկեր, «Մարզամշակութային կենտրոնի» տնօրեն Էդիկ Պիճիկյանը ներկայացրեց ընկերոջ անցած ուղին: Հիշատակեց արված ու կիսատ մնացած գործերի մասին: Հուշամրցաշարին ներկա էին Վահրամի հայրն ու որդին՝ 14-ամյա Տիգրանը, քաղաքապետարանի աշխատակիցներ, մարզադպրոցի ներկայացուցիչներ, ընկերներ ու աշակերտներ: Զխախտելով ավանդույթը՝ բացման արարողությունից հետո հուշամրցաշարի մասնակիցներն այցելեցին Վահրամի շիրիմին: Վ. Նիգոյանին նվիրված ամենամյա հուշամրցաշարի վոլեյբոլի բաց առաջնությանը մասնակցում էր 9 թիմ՝ 2 թիմ ավագ դպրոցից, հիմնական դպրոցից, արհեստագործական ուսումնարանից և մարզադպրոցից մեկական թիմեր, ինչպես նաև Բյուրեղավանի վոլեյբոլի հավաքականի, Վ. Նիգոյանի ընկերների, Բյուրեղավանի ոստիկանության և ավագ դպրոցի ուսուցիչների թիմերը: Մրցաշարի գլխավոր մրցավարն էր ավագ դպրոցի ֆիզկուլտուրայի ուսուցիչ Էդիկ Իգնատյանը: Տարեցտարի մասնակից թիմերն ավելանում են, ինչը վկայում է հետաքրքրությունը մրցաշարի հանդեպ: Թիմերի միջև պայքարը թեժ էր: Եզրափակիչ փուլ դուրս եկան մարզադպրոցի և Բյուրեղավանի վոլեյբոլի հավաքականի թիմերը, որտեղ հաղթեց հավաքականի թիմը: 2-րդ տեղը բաժին հասավ մարզադպրոցին, իսկ 3-րդը՝ ավագ դպրոցին: Լավագույն մասնակցության համար պատվոգրերի արժանացան հիմնական դպրոցն ու արհեստագործական ուսումնարանը: Պարգևատրումը կատարեց Բյուրեղավանի քաղաքապետ, մրցաշարի հովանավոր Հակոբ Բալասյանը: Նա մեծ կարևորություն է տալիս մրցաշարերին, քանի որ այն նպաստում է սպորտի զարգացմանը: Վերջում, քաղաքապետի կողմից նվերներ՝ մարզահագուստ և սպորտային գնդակ հանձնվեց Տիգրան Նիգոյանին:

04.12.15.